

李文襄公別錄

李文襄公別錄卷之四

軍旅紀畧

照會四鎮防禦海疆

照會四鎮申嚴軍紀

照會四鎮查訪劣弁

飭太湖營遊擊嚴防湖港要隘

飭湖協副將嚴防長興四安一鎮要隘

照會平陽鎮并飭衢協守禦地方

照會溫州鎮并飭瑞安協守禦地方

照會四鎮濱海地方嚴加守禦

檄調溫處二協屯據泰順龍泉險隘

檄金嚴二協官兵駐江山常山聽調

飭溫州鎮協嚴防要隘

飭紹協副將撲剿土寇

檄飭察拏傳遞偽牌奸宄

檄調湖協官兵赴省紹協官兵赴衢

檄發本標中軍副將統兵赴衢

飭分防金鄉遊擊賈文學保固地方

檄中軍副將賞賚在衢官兵

檄調嘉興營守備晉大忠領兵赴省

飭委統領戎旗選鋒官管轄親兵
照會四鎮各協營預給兵丁糧餉
檄中軍副將統領抽調赴衢官兵
密授衢處溫三協副將堵禦機宜
檄各鎮協副叅遊稿賞軍士
檄調平陽鎮遊擊協防分水關
檄紹協副將獎賞殺賊官兵
照會平陽鎮保固分水關
照會溫州鎮防禦海疆策應分水關
諭調金協副將協守常山

諭中軍副將知照金協赴衛

諭中軍副將獎賞退賊官兵

檄狼山遊擊武榮犒勞援浙官兵

給照免罪魏于文等執牌招撫

檄中軍副將賞勵臨山勦賊官兵

照會各鎮嚴禁焚燬民房

檄各營將查給諸暨難民子女

檄各鎮將頒示賞格鼓勵衝鋒

檄飭各將嚴禁搶擄妄殺

檄飭嚴協總理恢勦機宐

檄飭寧紹台三協營靖寇安民

檄飭嚴協防勦機宐

照會援勦鎮申明賞罰

檄飭衢協相地置防

檄飭嚴協會兵乘機撲勦

檄飭嚴協赴開化防禦

照會援勦鎮嚴查營兵藏匿婦女

照會溫州平陽二鎮乘機勦撫

檄叅將蔣懋勛統領駐防常山官兵

檄催福督中軍官兵赴衢防勦

飭金協都司任九玉勦撫湯溪土賊

檄叅將蔣懋勛勦玉山開化賊寇

牌委標官卞佳招撫

獎勵千總趙秀

檄叅將蔣懋勛招撫廣信地方

牌委標員疊更司賑浙閩過往人夫

飭金協副將乘時招撫

飭樂清營大荆營各將乘時撫勦

照會黃巖鎮撫輯鄰疆

飭原任把總胡聯啓率兵來歸

照會溫州鎮勦撫直取甌城

牌給千總葉順招撫

牌給守備尹升招撫

照會溫州鎮亟赴料理嚴疆

檄飭沿海鎮將稽察固防

諭杭州溫州二副將犒賞弁目兵丁

照會定溫平三鎮沿海嚴謹備禦

檄湖處杭嚴四協調兵彈壓延平

照會定海鎮飭催撲勦海寇

差員嚴拏不法兵廝

飭衢處二協副將防剿竄賊

檄中軍副將會剿江西逆賊

檄金協都司郭正明等截擊敗寇

檄守備張萬成領兵協防二渡關

檄叅將饒承德會兵協剿山寇

檄叅將饒承德查仙霞營房窩舖

檄叅將饒承德招撫江機等渠寇

李文襄公別錄卷四

男 鍾麟編次

照會各鎮防禦海疆

康熙十二年十月

爲嚴飭防禦海疆以重汛守事照得浙省地當邊海
寧台溫郡尤屬要衝是以選將屯兵星羅密布無事
則勤加偵揆遇敵卽破浪摧鋒是必平日嚴防密備
務使逆艘潛蹤毋致奸民竊越最是風雨晦冥洋霧
連接一望茫然遠視不及甚恐賊踪飄忽近岸若官
兵懈弛偷安但以寥寥庸卒虛應故事抑或兵不在
汛無人稽察倘有警息便失勦禦疎防之罪百喙難

辭將弁身家固富自惜所在疆土人民豈堪坐視貽
患本部院叨膺

簡命節制全浙以澄清邊海爲首務合行嚴飭爲此照會
該鎮照依事理轉行所轄督率弁兵不時隄備兵馬
戰船晝夜詳加巡瞭俱於要隘遊巡揆報如遇逆賊
揚帆上下無論接櫓連踪零星窺伺一面飛報本部
院軍前暨提鎮衙門以憑飛檄調度一面聯絡鄰汛
官兵協力蕩勦若遇迫近海口卽駕所泊戰船一齊
堵截相機擧擒必期滅此朝食其保無虞毋許一船
近岸劫掠毋容一人透越交通如有將弁偷安怠惰

致誤軍機大則飛章指參小則軍法從事失哨口兵
審明梟示斷不姑徇至於沿海江港潮汐相通處所
如有船筏載貨乘風越界希圖貿易或爲賊巢奸細
要見原通某弁某兵受賄當從某口放行立速拏獲
會同有司秉公研究確詳起解以憑覆訊定擬苟有
容隱故縱情弊立按

新例正法但不得借端誣捏擾害無辜汛防各官仍會同
地方官嚴查保甲盤詰奸宄凡兵民人等或係出外
日久不歸或容畱來歷不明面生可疑之輩必須根
究明白一有故違地方保甲營伍目兵一體連坐汛

防印捕各官特疏

題泰法在必行毋得視爲尋常告誡自罹大咎追悔無
及

申嚴軍紀

康熙十二年十月

爲申嚴軍紀以綏地方事照得設兵所以衛民設將所以統兵務宜訓練有方統御得法庶幾兵民相安疆圉有賴乃近日驕兵悍卒往往不遵紀律騷擾民間有攫取財物者有分防苛派者有酗酒賭錢放債剝削者有藉緝私鹽誣害良善者種種不法民何以堪在各將弁既無捍禦之益復鮮約束之能更有剋餉肥己虛冒兵糧耽逸偷安疎防縱盜不惟職守有乖抑亦有悖

國典本部院叨膺

簡命節制茲土必期力除夙弊務使壁壘改觀今當下車
伊始合行嚴飭爲此照會該鎮照依事理即便轉飭
所轄申明紀律約束弁兵不許蕩踰軍紀倘有仍前
徇縱擾民侵剋虛冒等項兵卽立按軍法官卽揭報
題叅本部院統屬文武兵民原無岐視倘果兵民輯睦
謀畧著聞本部院自當專加優異特疏薦揚各宜自
展壯猷毋得身干咎讐勉之慎之

照會各鎮查訪劣弁

康熙十二年十一月

爲查訪不職劣員以肅軍紀事照得

國家選將屯兵原爲保護生民奠安疆土是以民有輸將資其俸食官有超擢酬其功苦惟在專闢分戎者仰體

朝廷優異之隆時加儆惕恪盡厥職各於汛防熟酌戰守機宜所統士卒則必畱心簡練務期平日可以建威消萌有事足以衝鋒對壘而又文武和衷兵民安輯庶有裨於地方況浙省地臨邊海年來災祲頻仍內則瘡痍未起外則寇警戒嚴凡有捍禦惟各鎮將弁

是賴其間清操自勵紀律嚴明者固不乏人惟是有
等貪殘乖張之輩不遵鎮帥約束事上剛愎恃氣馭
下刻薄存私或冒馬虛兵或借端剋扣甚至賈易專
利放債准折官價虧行干預民事縛制有司廢弛管
伍疎防縱盜與夫諱盜誣良等類是皆難容貽誤地
方且將弁律已不嚴自必縱兵生事或佔民居又勒
供飯或市井行兇鄉村竊掠以及強買強賣一切殘
害民間者均屬不法詎可姑容至於都司衛所各弁
雖職專軍屯然皆有催徵倉運等事其剝削加派縱
囊養奸種種糜祿誤公者亦復不少今本部院奉

命督漸詰戎固圉兼欲體恤軍民首當甄別將弁賢否茲
當下車伊始凡有不職者先行糾劾合行嚴查爲此
照會該鎮照依事理卽將所轄大小各弁逐加體訪
一有犯及前項情弊并通洋貿易等事劣狀昭彰者
備開該將弁贓款實蹟的限 日內密揭呈報以憑
飛章叅

奏拏問究擬至於察訪之法必須持廉秉公不得因循
瞻顧姑舍將領但以偏裨末弁塞責亦不得故寬貪
暴重款止於點綴微疵至款中所開務求實有其事
如款內竄役并被害証佐亦必實有其人不許捕捉

風影暗砌詭名以畱日後辨實毒一事款內又必詳書所犯年月日期毋得游移朦混以開審勘出入之端如去任已効之官概勿開送充數此外果有謀勇超羣廉能素著者本部院不吝特疏薦揚以示優異該衙門久任地方聞見必確萬勿徇情寬縱如不依限揭報本部院察訪有據徑自具疏糾効如於事後補揭其徇縱之咎仍不能寬慎毋泛視致貽後悔至嚴至切

檄飭太湖營嚴防要隘

康熙十三年三月

爲申嚴防範要隘以弭盜源事照得太湖巨浸環繞江浙其間支港錯雜盜賊易聚屢經本部院申飭告誠在案備查浙汛沿湖各港雖設有官兵巡防稽詰但港多兵少何足分防如大錢夾浦蔡浦港等處皆湖濱要隘其餘各港何止數十餘處見在防兵寥寥無幾設有盜賊竊發作何剿禦合行酌議相地添防爲此牌仰該遊擊照牌事理卽查浙江沿湖各汛港口除支河小港見在釘椿豎柵禁止出入其餘險隘港汊舟楫相通者其有幾處見在防守官兵實有

幾何星速查明呈覆一面作速相度形勢添兵防守
早晚勤加偵察卽釘塞各港亦不時差兵巡緝毋致
奸宄竄跡仍整飭營伍操練官兵倘有奸宄乘機竊
發卽卽詰獲通報以憑審究毋得違誤疎虞

檄飭湖協副將嚴防長興四安鎮

康熙十三年三月

爲申嚴防守要隘以固疆圉事照得湖郡水鄉澤國
支港錯雜其間萑苻易聚在在自宜嚴防而惟長興
爲最要查長興形勢有四安一鎮路通江南之廣德
可以直達江寧計程不過三日且皆係坦途并無關
隘則是長興爲江浙藩籬而四安爲長興要隘雖駐
防縣鎮設有守備千總然各統官兵爲數無幾在平
常無事可備巡防若遇盜賊竊發江浙接壤孔道豈
寥寥戍卒足以分防合行酌議添兵守禦爲此牌仰
該副將照牌事理卽查長興四安鎮地方旣係通衢

要地實在官兵防守不敷亟爲確酌情形一面量調
郡城官兵前往添防一面相度形勢分扼險要稽察
奸宄設有蹤跡詭祕之徒潛入境內及土賊竊發立
卽擒拏務保無虞毋致疎忽

照會平陽鎮并飭衛協守禦地方

康熙十三年三月

爲飛飭守禦地方事康熙十三年三月二十九日據
溫州鎮塘報內稱靖藩變亂緣由到本部院據此爲
照浙閩地方接壤據報閩省兵變合行飛調官兵堵
禦爲此照會該鎮牌仰該將照依事理即便躬統本標營官兵星
夜前往分水關橋墩門仙霞關小竿嶺一帶立據關隘嚴謹固守多
方偵探相機援應毋致疎虞本部院見在飛調大兵
前來鎮守軍機緊急不時飛報勿得遲延怠忽慎速
慎速

照會溫州鎮并飭瑞安協守禦地方

康熙十三年三月

為飛飭守禦地方事據報靖藩變亂除照會平陽鎮

躬統官兵前往分水關橋墩門一帶堵禦外溫郡與

瑞安平陽相距不遠合行飛調策應為此

照會該鎮
牌仰該將

照依事理即便嚴加防守城垣邊汛稽察奸宄一面

酌撥官兵前往

瑞安
平陽

一帶相機策應聯絡聲援協力

堵禦務保無虞本部院另調官兵齊集星赴事關軍

機毋得疎忽

照會四鎮濱海地方嚴加守禦

康熙十三年三月

爲飛飭守禦地方事照得閩省叛變浙境壤連水陸
交衝在在自宜嚴防本部院據報隨即調發滿漢官
兵前往衢州大路堵禦并行附近鎮將統兵扼守險
要本部院與

提督隨即相繼進發酌量調度外但閩省旣經倡亂
勢必結聯海寇濱海地方務宜加意防範用保燕虞
合行飛飭守禦爲此照會該鎮查照事理即便嚴飭
營弁會同守令固守城池一面躬統官兵巡防沿海
邊汛倘有賊踪突犯卽行協力堵禦仍飭各墩臺哨

卒遠偵確拔一有情形不時飛報本部院軍前以憑
調度毋得遲誤慎速慎速

檄調溫處二協屯據泰順龍泉險隘

康熙十三年三月

爲飛飭守禦地方事照得閩省叛變浙境壤聯本部院據報隨卽調發滿漢官兵前往衢州大路堵禦并行附近平陽溫州各鎮管統兵扼守險要本部院隨卽與

提督相繼進發酌量調度查

溫屬泰順處屬龍泉

各處山谷實

與閩省

福寧建寧

徑路相通可直達

溫處

郡合行飛調防守

爲此牌仰該副將照牌事理卽便酌派營弁會同守

令固守城垣一面躬統官兵前往

泰順龍泉

與閩省交界

處所屯劄先據險隘竭力堵禦務保無虞仍遴選精

細兵快遠偵確揆一有情形不時飛報本部院軍前
以憑調度毋得玩忽疎虞慎速慎速

檄調金嚴二協官兵駐防江常等處

康熙十三年三月

爲緊急軍務事照得閩省叛變浙江衢溫二府最屬
密邇本部院據報隨卽調發衢協副將李承恩統兵
前往仙霞關屯劄扼險守禦一面見發滿漢官兵前
往策應但查衢屬江山常山二處逼近閩疆務宜厚
集兵力以備不虞合行抽調爲此牌仰該副將照牌
事理卽便遵照文到卽將標下官兵挑選勇敢勁兵
四百名酌撥守備千總一員統領前往衢州駐防江
山常山等處聽候本部院另行調度卽具起行日期
呈報查考事關軍機毋得遲違

飭溫州鎮協嚴防要隘

康熙十三年四月

爲飛飭守禦地方事照得閩省變亂勢必勾通海逆
分頭入犯浙境水陸交衝處處自宜嚴防溫郡尤屬
濱海要地合行飛飭守禦爲此照會該鎮屏仰該將照依事理
卽便整頓兵馬器械倘有賊踪飄突卽便相機堵禦
仍會同文武官弁加意保固城池知會鄰近汛防倚
角聲援遇警策應一面撥發官兵前往泰順通閩山
險去處密核情形嚴防要隘不時飛報本部院軍前
以憑調度軍機事重慎毋疎忽速速

檄飭紹協副將撲剿土寇

康熙十三年四月

爲稟報賊情事康熙十三年四月初三日據紹興府報稱湯浦等處因閩省變叛土賊相繼嘯聚山林者百十餘人伏乞發兵撲剿等因到本部院據此爲照浙省地方久經寧謐頃報閩省兵變浙境壤地相連誠恐山海土寇乘機竊發本部院屢次申嚴防禦在案今據紹興湯浦等處有賊聚至百十餘人騷擾村坊合行飛飭撲剿爲此牌仰該副將照牌事理文到卽便撥發官兵遴委勇敢都守一員統領會同廳縣捕快前往湯浦四都一帶地方將前項土賊盡行殲

滅務盡根株毋使滋蔓仍確揆別處有無餘黨窩線
密行躡緝將情形不時報聞更須申明軍紀束兵愛
民不得因而擾累無辜察出取咎未便速速

檄飭察拏傳遞偽牌奸宄

康熙十三年四月

爲特嚴察拏偽牌奸宄以靖地方事照得閩逆倡亂各處山賊乘機竊發冀圖搖惑人心糾結黨羽輒敢捏造偽牌僞示公然粘貼傳遞恐嚇愚民若非奸宄潛藏暗通消息何以賊黨牌示擅行鄉鎮凡地方文武官弁叨受

國恩同仇義切自當一見憤激立行焚燬并查來自何處傳自何人搜緝奸宄立正軍法方爲盡職何以任其遞送遂致民情惶惑逃匿山谷奸徒因之嘯聚殊堪髮指嗣後如有山海賊寇暗遣偽牌傳遞鄉鎮及

張掛偽示冀圖煽惑人心者立將牌示卽刻焚燬并
拏傳遞潛藏奸黨審實有據解送軍前立行正法務
期寧靖地方毋得擾動良民均宜凜遵

檄調湖協官兵赴省紹協官兵赴衢

康熙十三年四月

爲飛調官兵事照得閩逆叛亂浙省連界防禦宜周
亟須調集官兵相機策應況當疆場有事之時正俊
傑立功之會爰資材武用震軍聲合行飛調爲此牌
仰該副將照牌事理文到卽刻挑選該營勁勇兵丁
六百名遴委勇敢能員統領各帶軍裝器械星馳前
赴省城聽候調遣務須人馬強壯器械精整該副將
忠悃素著爲

國諒有同心轉飭營弁奮發忠勇力樹勤勞報功之日
本部院定當特疏

題敘

朝廷必酬報

國之丹心將領亦遂建功之素志勉旃毋忽

檄發本標中軍副將統兵赴衢

康熙三十三年四月

爲督發官兵守禦要隘事照得閩寇叛亂浙省界連防禦宜周亟須調撥官兵往守險要該副將韜畧素嫻謀猷綽裕今姦宄跳梁之日乃干城建樹之秋合行督發起行爲此牌仰該副將照牌事理卽行遵照統領標下中營馬步官兵各帶軍裝器械星馳前赴衢郡相度形勢扼守險要仍將情形不時飛報本部院軍前以憑調度該副將受茲委任務須一心捍衛千里清寧報捷書功本部院定當特疏

題敘

朝廷必有旂常之懋賞該副將亦遂弧矢之丹衷勉旃毋忽

檄飭分防金鄉遊擊保固地方

康熙十二年四月

爲申嚴保固疆圉事康熙十三年四月初三日據該遊擊塘報內開偵探靖藩兵變緣由到本部院據此爲照閩省兵變平陽密邇福寧金鄉尤屬溫汛要地本部院聞報卽行調發鎮營官兵前往守險堵禦該遊擊素具長才夙摠忠悃瀕海險汛實藉綢繆當此逆氛倡亂勢必侵犯鄰境務宜更加勉勵用固疆圉合行飛飭守禦爲此牌仰該遊擊照牌事理卽便整頓兵馬器械遠偵確探倘有賊踪飄突相機奮擊保障隄防再查金鄉離分水關不遠就近報聞該鎮拏

角聲援聯絡策應仍將警息不時飛報本部院軍前
以憑調度倘能更展謀猷摧敗寇賊本部院自當察
明功績從優

題敘萬勿玩忽疎虞勉之慎之

檄行中軍副將賞資官兵

康熙十三年四月

爲頒給賞資激勵忠貞以鼓敵愾事照得閩逆猖狂稱兵叛亂凡我將士義切同仇本部院調發滿漢官兵守險堵禦所賴將弁一心士卒用命共搃丹赤以保封疆果能樹建奇功不惟

朝廷恩榮超擢行將勳勒旂常名垂竹帛此正忠臣義士奮發有爲之時也本部院軫念各將士披堅執銳効力疆場特發帑銀犒賞以昭鼓勵合行知照爲此牌仰該副將照牌事理即將本部院差官張一亮等押到餉銀一萬兩會同嚴州府同知金雲鳳查明在衢

滿漢官兵人數除滿洲漢軍各位領兵章京查照另單禮數分餽致敬外其滿漢甲兵以及撥什庫各照伊一月餉銀數目賞資彙解駐衛

副都統

吳石

軍前聽候俵散給發其綵旗官兵自本

標中營衛協以及調到各路官兵俱各查明實在官兵數目官按一月俸銀兵按一月餉銀之數給與其兵丁按名唱給以示鼓舞若有餘剩交貯府庫聽候另行支用仍誠諭各官兵務須益加勉勵登陴歷險俱各奮勇爭先嗣後立有功績者另行隨時頒賞功績尤著者自當不時

題敘各宜勉旃毋負倚任卽將發給過數目具文報
毋違

檄調嘉興營守備晉大忠領兵赴省

康熙十三年四月

爲飛調官兵事照得閩逆叛亂浙省連界防禦宜周
亟須調集官兵相機策應該營守備晉大忠素稱勇
敢前有邊海立功之請今當疆場有事爰資材武用
震軍聲合行飛調爲此牌仰該遊擊照牌事理文到
卽刻轉行晉守備統領勁兵六百名各帶軍裝星馳
赴省聽候調遣務須士馬精壯器械整齊該遊擊併
飭該守備奮發忠勇力樹勳勞本部院定當特疏
題敘以昭懋賞勉旃毋忽該營事務另委能員署理可
也

牌委統領選鋒

康熙十三年四月

爲委用統領選鋒官員事照得標下三營將士皆本部院臂指之助而從來用兵制勝必有選鋒平時則護衛帳前臨陣則衝堅破敵今於三營內校試弓馬精良勇敢當先者每營百人必得能員統領以壯軍威查中營隨征官劉澤溪左營儲將官張文福右營隨征官王文魁久歷戎行諳練營務才藝兼優允堪茲任合行委用爲此牌仰本官照牌事理今委爲中左右營統領選鋒守備各管轄親兵一百名常隨本部院帳前務須嚴明約束勤行訓練使紀律肅然軍

容整暇爰成勁旅以建奇功本部院自當

題敘實授尙其勉旃

照會四鎮并行營將預給兵丁糧餉

康熙十三年四月

爲預給兵丁糧餉以恤勤勞事照得軍興旁午各標營兵丁調防駐守以衛封疆竝皆勞苦本部院憫念各兵皆有父母妻子平時支給額餉止可贍給一身已難兼顧今警備邊圉行者有資裝之費居者有守望之勤推其至情均應體恤本部院一片丹誠無時不痼瘝身切今將通省兵丁不分調汛畱營一體預給糧餉以資飽騰合行知照爲此

照會該鎮照依事
牌仰該將

理卽將各標營兵丁糧餉各准預支一月於司庫支給見今調發赴省者卽於省城支給已調別府及仍

留本汛者該管將領卽具冊領專差赴省齎回分發
各兵務須奮勇爭先同心報

國奏凱旌勤別有賞賚如能特立奇功定行破格
題敘各宜勉勵毋怠

檄委中軍副將統領調到官兵

康熙十三年四月

爲軍務事照得閩逆倡亂衝屬首衝經制官兵不敷防守是以本部院抽調金嚴二協官兵共八百名赴衢貼防江山常山等處但各路官兵齊集合行專責統領爲此牌仰該副將遵照卽將金嚴二協抽調赴衢官兵各四百名并領兵守備千把總各官俱屬該副將統領約束一應支給糧料整齊甲械調遣戰守俱該副將相度形勢悉心料理酌量江山常山二處險要分兵防守務須申嚴紀律束兵安民恩威並用協力同心以副本部院委託之意至於守關據隘戰

守機宜該副將仍聽駐衛

副都統吳石酌量調度其有續到各營官兵俱照此例

毋得違誤

密授衛處溫協副將堵禦機宜

康熙十三年四月

爲密授堵禦機宜以固封疆事照得閩逆變亂侵擾邊疆浙省陸路要隘如衛之仙霞處之龍泉慶元溫之分水關泰順等處皆接連閩省在在須防突犯本部院一面題

請亟發禁旅前來接應一面速行據險扼要嚴加固守設奇制勝相機進止查仙霞龍泉慶元泰順分水關各處皆山溪錯雜有險可據我兵扼守必擇其兩傍石壁中惟一路可通之所兩邊壘石特爲門戶埋兵設伏中空一道惟用多藏砲火逆賊雖衆限於山路窄

狹勢必不能參擠而前俟其一至火砲齊發賊必少
退乘其步驟已亂出兵奮擊不可乘勝遠追卽回據
原處此時火砲藥彈又可裝就如賊再至又如前法
擊之賊鋒必挫自不敢侵矣更恐賊從兩旁山頂
突然而至勢不可禦必於兩邊高處多設鳥鎗礮石
伏兵偵望毋分風雨晝夜一有侵犯鎗石自上而下
一可殺百此正據險設奇以少勝衆相機進止之要
策至於臨敵隨時制宜因地變通方畧又在該將一
心之運用耳擬合亟行知照爲此牌仰該將照牌事
理卽便會商守禦諸將一體協力遵照毋違

檄行各鎮協將犒賞軍士

康熙十三年四月

爲申大義以鼓將心布至誠以作士氣亟勵忠貞共
圖報

國事照得閩逆猖狂稱兵叛亂凡我多士義切同仇本部院忝膺重任秣馬勵師所賴將士一心士卒用命
其攄丹赤以保封疆諸鎮協久著邊功洵承

天寵爵榮傳世寄重登壇必能率勵三軍折衝一面若叅
遊都守雖分班列竝託干城平時守職不過次遷今
日建功卽蒙超擢竝宜枕戈待旦賈勇爭先千把等
官初試長途咸叅

命秩苟能奮其材武自可立致顯榮偏隅負固撻伐用張
順逆既殊大小懸絕未戰而勝已決幾先効一朝汗
馬之勳樹百世旂常之績忠臣義士可不勉旃至於
馬步守兵登陴臨陣竝極辛勤居送行齋殊淡勞苦
本部院會同

撫院
提督

酌議額餉之外仍加優給欲使投醪飲惠挾纊

知溫各宜奮力前驅另自計功行賞用是開誠布告
鼓勵羣心崇卑雖有殊倫忠義本無二理戴高履厚
孰非

君父之恩仗義同心卽是身家之福合行通諭爲此

照會
牌仰

該將領照依事理即便抄牌出示轉諭大小將領務須
布展方畧鞏固邊疆鼓勵隊目兵丁共抒忠憤懋建
勲勞在

朝廷特懸殊格以待奇功近如湖廣報捷齎奏人員亦膺
一命之榮何況行間將士本部院論功

題敘自當巨細不遺以副酬勲

盛典目今軍書旁午優恤宜先各官兵不論隨征守汛優
給賞賚官按一月俸銀兵按一月餉銀如數給發俱
各差員赴省支領作爲犒勞不在歲額之內應領月
餉仍照舊給發嗣後如立有功績者另行隨時頒賞

功績尤著者不時

請敘凡我將士共聽斯言

國傳家正在此日矣

檄調平陽鎮遊擊協防水關

康熙十三年四月

爲酌調官兵事照得閩逆搆亂平陽最爲鄰近而分水關尤屬衝衝已經鎮標官兵防守但山徑叢雜惟恐偷越更須謀勇能員協力堵禦今查該遊擊風嫺韜畧久著謀猷拒險設奇堪當此任金鄉懸隔江海形勢稍緩合行酌調爲此牌仰該遊擊照牌事理卽便統率驍勁弁兵星赴分水關協同防守抒忠奮勇建功樹勳本部院自當特疏

題敘其金鄉防守事宜聽平陽總兵官酌行調度該遊擊務體本部院甄選至意勉之毋忽

檄行紹協副將獎賞殺賊官兵

康熙十三年四月

爲塘報事照得土寇乘機嘯聚亟宜撲滅據報官兵奮勇爭先斬賊奪械殊爲可嘉効用官李章張酉彭輝及兵丁陳元陸貞王以良合行獎賞爲此牌仰該副將照牌事理卽將發來銀牌三面紅紬三匹給賞李章等三名又銀牌三面給賞陳元等三名仍飭屬官兵用心搜剿務盡根株毋使漏網

照會平陽鎮保固分水關

康熙十三年四月

爲軍務事照得閩逆鴟張平陽最近原宜厚集兵力拒守險要前照會該鎮統師駐守分水關自必忠義奮發率勵將士保固巖疆然平陽通閩大道不止分水橋墩一處恐兵勢分應難周是以會商

提督撥發提標官兵五百名前來協防亦足以扼險守禦至於金鄉係屬彈丸一隅向撥該鎮左營官兵防守原以防海寇之侵突今陸路告警揆度形勢金鄉未爲衝要已經密飭該遊擊統兵前赴分水關協同堵禦其金鄉防守事宜聽該鎮自行酌量調度務

須併力守關保固無虞一面已經照會溫州鎮聯絡策應該鎮雄才偉畧夙著威名值此疆圉多警正忠君報國之時惟冀大展謀猷同心共濟奠安之日本部院自當特疏

題敘行將勦勒旂常名垂竹帛以昭報績酬庸之典擬合照會爲此照會該鎮查照事理一體遵照勉勵建績慎速

照會溫州鎮防禦海疆策應分水關

康熙十三年四月

爲軍務事照得閩逆叛變勢切震鄰平陽密邇福寧
是以飭令平陽鎮總兵守禦分水關然逆賊狡謀勾
聯海寇或致沿邊侵擾溫屬一帶逼臨海濱凡防禦
事機戰守良策惟該鎮是賴至於平陽路阻飛雲尤
須勤加哨探相度聲援聯絡策應并鼓勵將士奮發
勇敢保固衝汛該鎮素優方畧雅擅機宜當此烽烟
緊急正抒忠報

國之時惟冀壯猷大展義氣宏宣奠安之日本部院自
當特疏

題敘行將旂常著績彙鼎登名以昭報功策勳之典擬
合照會爲此照會該鎮查照事理一體勉勵建績慎
速

諭調金協副將協守常山

康熙十三年四月

諭金華副將前調該管官兵協防衢屬已經進發知該副將忠義奮激勇氣無前本部院可勝嘉尚特資壯畧共衛嚴疆當邊方有事正臣子報

國之時豪傑展勳之日若通省將士盡如該副將則本部院倚藉成功指日可期矣諭到該副將即便帶領驍勁官兵一百名前往衢州協守常山大路先次所發官兵三百名檄行中軍副將總領今該副將既經親往仍歸統轄已另諭中軍知照一切堵禦機宜該副將隨方布置務須展抒方畧大建奇勳本部院自

當特疏

題敘以昭報績酬庸之典勉旃特諭

諭標下中軍副將

諭中軍副將官兵此時計當抵衢一切布置情形宜
不時速報金華牟副將忠勇出羣今已調令親赴衢
屬協力堵禦其該營前次調到官兵仍歸牟副將統
轄調度特此諭知

諭賞退賊官兵

康熙十三年四月

諭中軍王副將據報本月十五日賊兵突犯清湖攻逼江山該副將星馳赴援千總高祿陳國任薛受益渡水奮擊闖寇大敗陣獲馬匹刀鎗等件賊隨退回等因本部院深爲嘉悅本標及協標在事有功官兵該副將分別功勞等第卽於前發銀一萬兩內酌量頒給諭以本部院獎勵忠勇憫念勤勞之意千總高祿等率先破賊另自紀功該副將親冒矢石首挫賊鋒今劄營城外誠爲獨任賢勞然旂常之績從此而始勉之勉之茲

提督副都統已統兵前來本標官兵五百名一併進發矣本部院稍俟整頓糧草有緒卽當親行該副將一應進止機宜并聽提督調度蓋軍中號令必須專一總期同心報

國勿以本標致有岐視至於安營處所必須據其形便謹防賊兵衝突後到兵五百名應於相近處別劄一營以成犄角之勢尤宜熟揆路徑相機防禦凡事不能遙度該副將用心籌畫務出萬全一切糧草地方官見在作何接濟情形仍不時馳報以便預爲措置故論

檄行狼山遊擊犒勞援浙官兵

康熙三十三年五月

爲犒勞官兵事照得逆賊猖狂浙省用師征勦江南
總督部院 義切同仇調發官兵前來策應諸將士驅
提督軍門 馳遠道以副簡書雖報

國自有素心而勤勞實堪軫念鄰封有賴犒勞宜先合
行知照爲此牌仰該遊擊照牌事理卽將發來犒銀
遊擊俸資三十二兩千總俸資十六兩把總每員俸
資十二兩馬兵每名賞銀二兩步兵每名賞銀一兩
聊充牛酒之需以勵三軍之氣將來建立功勳定當
題敘優資報績酬庸另照

部頒賞格各宜勉旃

給照招撫牌

康熙十三年六月

爲給牌招撫以廣

皇仁事照得開誠布信乃行師之大義見幾反正卽智士之良圖自逆藩倡亂人心動搖不思殺賊以取職官乃反忘軀而殉僞制其中無知迷惑者固多豈無一二抱負奇才不甘終淪草澤或因無路自歸懷疑觀望今據魏于文葉觀徵等供稱朱石年等在九都源地方招集人衆原因逋負所迫激而走險願將家屬爲質前往招撫等情本部院欽奉

上諭凡有殺賊立功卽行優敘或能隻身歸命亦准收畱

天恩浩蕩嘉與維新令行給照爲此牌仰魏于文等免爾
前罪即便執牌并瞻發

上諭前往九都源等處宣諭

朝廷恩信如朱石年等淡明順逆真心效順率領大衆投
誠或能擒斬閩賊自效並當論功

題敘授官頒賞其有自拔來歸悉與安插得所

綸音渙頒皎如日月轉禍爲福惟在此時爾等刻期回報
須至牌者

檄中軍副將賞勵臨山勦賊官兵

康熙十三年十月

爲賞勵官兵事照得本部院統師討賊既藉將領同心尤賴士卒用命各營官兵隨征半載咸能奮勇先登所至克捷且恪遵紀律不擾地方今該中軍在臨山一帶勦賊安民本部院不勝喜慰在事官兵合行犒勞爲此牌仰該副將照牌事理即將發來銀兩內各將領花紅銀副將每名十兩守備每名六兩隨征都司千總每名四兩把總每名三兩目兵犒賞銀槍賊兵每名五錢殺賊兵每名三錢隨陣兵每名二錢照數分頒其陣亡兵每名先給卹銀五兩仍查明家

屬具報另候加恩撫養該中軍宣諭將士益勵忠勇
建立功勳共奏蕩平以膺超敘

照會各鎮嚴禁焚燬民房

康熙十三年十二月

爲嚴禁焚燬民房事照得大兵進剿原以滅寇安民
凡賊寇盤踞經過之地焚其木城柵寨至賊寇占住
民房原無燒燬之令此不足以斷賊蹤而徒傷民業
合行嚴禁爲此照會該鎮查照事理即便遵照并轉
飭各該將弁凡進剿賊寇兵馬所到地方止應殺賊
不許焚燬房屋如有大夥賊寇盤踞巢穴造有木城
柵寨之處亦止許將木城柵寨拆毀焚燒有將民房
混行焚燬以致百姓失業業者定將領兵將弁叅究不
貸

檄各營將查給諸暨難民子女

康熙十三年十二月

爲賊寇倡亂負固宜誅避難子女被掠可矜等事據
紹興府詳請本部院檄行進剿暨邑官兵被擄子女
內有被難脅從者備細確查數目仍聽民間認領使
被骨肉重聚以昭

皇上愛養洪恩以副各憲好生德意等因到本部院據此
爲照大兵進剿原以滅寇安民被擄脅從蒙荷

皇仁矜憫則凡出征得獲寇賊所擄難民子女俱應查給
還民先經刊示通行曉諭在案今據前因除行該府
確查難民子女實據詳報外合亟行查爲此牌仰該

將照牌事理卽查本營及所統各營官兵於十一月
內進剿諸暨得獲男婦子女詢問明白如係賊寇所
擄難民子女立即移會該地方官出示曉諭民間認
領仍具報查考倘有官兵隱匿不舉或被首告或經
訪聞除將子女仍給還民外定將該將弁以搶擄
不法叅拏究處不貸

檄各鎮將頒示賞格鼓勵衝鋒

康熙十四年四月

爲頒示賞格鼓勵衝鋒事照得逆賊叛亂以來官兵
經年勦禦衝寒冒暑晝夜環甲備極勤勞每次進兵
獲捷皆能奮勇用命本部院旣蒙嘉獎更殷軫恤但
今逆賊屯踞近郊連營窺犯惟恃山林險阻延其喙
息如兩陣相當必得先鋒驍銳越衆先登後隊勇敢
齊心並進始可直接擣中堅斬擒渠首以成一鼓蕩平
之功凡爾各標營將士爲

國干城若能立時建績定當不次酬勳合行曉諭爲此

照會該鎮
牌仰該將

照依事理即便轉諭所轄官兵遵照凡有

勇敢超羣矢心報効願爲前鋒者卽於該管主將處
報名派立隊伍以俟進剿衝鋒如賊衆大列陣勢對
壘相持之際有能破陣深入當先立功不論百隊戰
守兵丁爲首之人賞銀五十兩授爲守備第二賞銀
四十兩授爲千總第三賞銀三十兩授爲把總遇缺
卽行先補其餘兵丁酌量給賞若係有職官弁另行
越資超擢其各主將開報捷功務須秉公核實倘有
將首功之人泯沒不報者許赴本部院控稟查詢明
確卽時補敘其主將以掩功虛報

題參至有臨陣退縮不前定行立正軍法斷不姑宥各

宜勉勵忠勇奏凱策勳本部院恩信有素匪託空言
咸宜遵悉

檄飭各將嚴禁搶擄妄殺

康熙十五年正月

爲特行申明紀律嚴禁搶擄妄殺以肅軍令以安黎庶事照得耿逆造亂勾連海寇侵犯浙疆前此溫台一帶鎮將叛變從賊以致生靈塗炭調發官兵進剿原爲滅賊安民自不容秋毫滋擾以致重困百姓況皇仁浩蕩

上諭屢頒加惠元元矜憫脅從嚴禁搶擄申誠妄殺在爾進剿官兵自應凜遵恪守今樂清被賊竊踞人民復遭荼毒誠恐恢剿官兵恣行不法合將禁飭緣由列款申嚴爲此牌仰該將照牌事理卽將後開禁諭各

款嚴飭各官兵一體遵照實力奉行敢有愍不畏法
妄殺無辜冒功請賞株連良善生事害民焚燒房屋
掠奪衣資搶擄婦女姦淫販賣有一於此或本部院
察訪得實或地方官稟有據將弁兵丁立以軍法
從事必不寬徇至嚴至切

一逆賊竊踞地方百姓如在湯火日望大兵進剿以解
倒懸行軍之際除執械抗拒者嚴行勦殺外其餘被
脅民人傾心歸命皆吾赤子投戈向順卽屬良民務
須加意安全不得槩加誅戮至於剪辮長髮地方既
爲賊踞實出勢不得已毋許故意苛求敢有擅殺無

辜慘戮歸誠希圖冒功請賞該管將領一經查出官
卽拏候請示兵部軍法處死倘該將領瞻徇容隱本
部院訪查得實一併參拏不貸

一民間婦女小子關係戶口錢糧恢復地方原期有土
有人斷不容進勦官兵橫肆淫掠卽見在賊巢者要
皆難民子女劫掠在營蓋真正賊寇豈有攜帶妻子
而行之理業奉

嚴旨禁飭不得一槩搶擄卽賊營所獲亦許民間認領欽
遵通行在案今官兵恢勦樂清凡民間婦女小子不
許搶擄姦淫卽有前被賊寇擄帶今被官兵得獲者

問明姓氏出示曉諭民間認領卽給完聚敢有貪淫不法弁兵或攜帶隨營或掠販遠地官卽叅究兵卽法處仍治該管將領約束不嚴之罪

一民間房屋廬舍被賊焚燒拆毀僅存無幾田園地土被賊蹂躪橫徵業已拋荒今恢復後加意培養滋植尚慮棲身無處餬口無資若官兵進剿再加焚燬踐食勢必哀鴻遍野露宿啼飢况賊屯住之處原係民居賊退之後卽成村落非賊巢木寨窩棚可比該管將領務須嚴飭官兵凡村莊市鎮所有房舍不許放火焚燒滋植田地不許踐踏割取敢有故違卽行法

處不貸

一近日爲賊奸徒皆係飢寒匪類搶劫橫行受害地方向之素封殷實者今已貧窮向之衣食充足者今已困乏所有劫掠之餘幸存衣資什物賴以稍資生命若進剿官兵再加搜奪勢必盡填溝壑且搶奪不法軍令首嚴該管將領務須嚴行約束經過地方必期絲毫無犯敢有不遵卽行軍法重處倘該管將領漫無約束容縱滋擾一併叅處斷不爾寬

一官兵所到之處或簞食壺漿來迎或導引接濟前進出自士民子來之義務宜優加鼓勵進剿官兵不得

強提良民扛挑甲械民間婦女不許凌辱姦淫該管
將領嚴加禁止一有違犯盡法究處慎勿姑容目干
重讐

一樂清復爲賊踞良民受害堪憐今次恢勦自應著意
安全予以休息官兵進勦止在對陣克敵擒斬賊寇
若通賊奸徒與謀爲不軌等犯應聽地方官搜查究
處以靖根株以消反側營中將弁兵丁不得攬越干
預敢有貪惡肆橫弁兵不事殺賊惟以借名查拏叛
屬生事株連索詐滋擾陷害無辜一經察出將領叅
拏弁兵究處不恕

檄飭嚴協總理恢勦機宜

康熙十五年四月

爲軍務事照得開常逆賊突犯跳梁前遣調各營官兵現在駐劄遂邑相機恢勦惟是軍中號令旣貴嚴明制勝機宜尤期畫一今瑞安營平陽鎮標衢協等營各有該營將領統束所部旣分事權不一或互相商酌遂生推避之端或所見參差難期滅賊之效甚非所以重軍紀嚴責成也該協身在本汛地理險要皆所周知偵探寇蹤堵禦出沒諒俱洞悉所有一應恢勦事宜及各管官兵專委總理爲此牌仰該副將照牌事理嗣後軍中一應恢勦事宜該將旣膺總理

之責務必運籌至當就近酌量調度毋得以主客岐
見有誤事機各標管官弁俱令遵照指畫共奮立功
倘有故違軍令各持意見致僨事機一面據實報聞
以憑叅究該將責成攸專更須實心籌畫以副倚任
果能剋期恢勦本部院自當從優
題敘如有疎誤責有攸歸勉旃毋忽

檄飭寧紹台三協營靖寇安民

康熙十五年七月

爲申嚴軍紀以靖寇氛事照得邇來地方多事山海
交訌伏莽可虞邊烽未息各該將領咸有專城之寄
務須時勤訓練加謹偵防如遇寇賊生發或值鄰境
戒嚴自應立刻調發官兵撲剿并移會近汛協力窮
追無分畛域盡絕根株使地方安寧斯稱職守近訪
聞各該將領玩愒成風遇有土寇竊發疆界毗連惟
事推諉或以驅趕出境即可卸責更且遲疑畏縮臨
敵不前以致鼠賊蔓延肆爲民害卽如狡賊謝雙奇
等不過逋誅遺孽竄跡大嵐四明山中勾聯烏合雜

時官兵各路會剿奚難捕獲乃一任其乘潮下海是
皆軍紀不嚴何能掃蕩寇氛勉圖實效合行嚴飭爲
此牌仰該將照牌事理嗣後一應險要地方務須嚴
督官兵加謹巡察如遇土寇流突或盜賊生發一而
移明該縣印官多撥捕役率同團練并知會鄰汛防
兵協同搜剿根株未靖不許遽撤回汛復致蔓延倘
敢仍然怠玩坐悞事機推諉因循養癰貽患以致渠
魁漏網遺孽復萌該將領從擁官兵分協之名不能
靖寇安民於地方安賴定行從重指參決不寬貸至
嚴至切

檄飭嚴協防勦機宜

康熙十五年八月

爲申飭軍機事照得逆賊屯踞開常屢據各將塘報
遂安情形緊急請兵添防查在遂各該協營官兵屢
次調集已成大旅不爲單薄該將職專統領應將各
汛險要從長相度某處最險當設重兵某處稍緩止
須防範兼顧用某處之兵策應用某處之兵逐一妥
籌有備無患至出師進勦尤必審度時勢調遣得宜
以期有戰必勝在汛官兵務必時加操演一經分派
各有專汛不許偷安懈惰尤須和衷集事共建功勳
方無負總統之任今進勦伊適合再一併嚴飭爲此

牌仰該副將照牌事理即便遵照將在遂各營官兵
籌酌妥當安置分防并將汛地情形及某營官兵見
防某處是否俱在防勦各緣由明白開報以憑核奪
方今

王師臨衢指日進勦誠恐狡賊分頭侵犯誘我兵勞該
將尤須申飭加謹固防如有任臆執拗不遵軍令偷
安自便欺蒙矯飾致誤事機即便據實報聞軍法具
在斷不姑貸倘若調遣乖張偏徇瞻顧稍有疎誤定
行從重叅處慎勿輕視

照會援勦鎮申明賞罰

康熙十五年八月

爲軍務事照得

王駕臨衛軍威百倍弔民殄賊全在此舉故必申嚴紀
律明示賞罰使人知所激勸則殲命爭先區區小醜
不難一鼓而殲該鎮身在行間更宜核實分別賞罰
以勵士氣爲此照會該鎮照依事理凡遇敵爭先有
功人員依前頒定賞格官則加等陞敘兵則從優賞
擢一面核明據實開報如有退縮不前故違紀律者
卽以軍法重治賞罰必行膚功克奏慎勿泄視嚴切
嚴切

檄飭衛協相地置防

康熙十五年八月

爲軍務事照得逆賊雖經敗遁但地方初定之時一應險隘緊要界口自應設立撥兵加謹偵防以爲善後之策合卽知照爲此牌仰該副將照牌事理卽將各路地方界址星速查勘明白某處係緊要汛地今應作何安設營官某人帶領兵丁若干名防禦偵探保固地方如有伏莽未除潛匿蹤跡者責令晝夜稽查搜緝務期奸宄潛消疆圉永固該將有地方專責不得疎虞遲誤仍將安設緣由立速具報查考

檄飭嚴協會兵乘機撲剿

康熙十五年八月

爲塘報事據該副將呈稱遂安兵單不足戰守呈請
添發官兵緣由又爲稟報事各等因到本部院據此
爲照開化逆賊向日敢肆猖獗原恃常山各路賊營
應援今下洲老巢賊渠敗遁大兵進發直抵仙霞恢
復江山縣城復又分路蕩勦常山已經攻克大小逆
賊咸皆喪膽遂安賊徒自必聞風驚懼已經本部院
檄行該副將將遂開各賊相機一併殲除在案今據
前因合再飭知爲此牌仰該副將照牌事理即便會
同在遂各將弁乘賊披靡之時立即相機撲剿先聲

所至草木皆兵無庸添發自必成功仍須設法招撫
以全羣黎生命軍行之處紀律嚴明不許私室有犯
乘時樹績以待超遷毋得藉端觀望坐失事機嚴切

嚴切

檄飭嚴協赴開化防禦

康熙十五年八月

爲亟飭駐守開城相機勦撫事照得衢郡河西賊寇敗遁我兵分路進勦恢復江常攻克仙霞直抵閩境今聞開化賊衆亦經宵遁新復地方急須官兵駐守合亟知照爲此牌仰該副將照牌事理即將原額各官兵會同都督謝鳳遊擊朱知微守備廖成功等卽日整頓兵馬星赴開化縣駐守相度要隘嚴加防禦如伏莽未靖卽行相機勦撫被難民人多方招徠早歸復業倘有兵丁不遵紀律騷擾地方者立按軍法重治并將賊寇敗遁情形不時飛報立速

照會援勦鎮嚴查營兵藏匿婦女

康熙十五年八月

爲嚴查營兵藏匿婦女以肅軍紀事照得官兵進勦收復江山原爲靖寇救民面奉

親王令諭不許擅動民間一草一木違者卽以軍法從事向來逆賊擄掠開常一帶子女悉皆安頓江邑今敗竄奔逃遺棄甚多倘有不法兵丁潛行藏匿大干法紀合亟嚴查爲此照會該鎮查照事理卽便通查各營如有收藏者許卽首明交與該縣看護俟親屬認領完聚如敢隱藏不報查出指名開報以憑按法重處該管營弁一體治罪斷不輕恕嚴切

照會溫州平陽二鎮乘機勦撫

康熙十五年八月

爲緊急軍務事照得逆賊馬九玉敗遁我兵恢復江
常開化三縣直搗仙霞連奪三關勢同破竹大兵進
閩逆賊倒戈溫處負嵎之賊膽落魂搖正宜宣布

皇仁乘時招撫立使解散一面相機撲勦先聲所至立可
成功且近日情形未據該鎮具報合卽飭知爲此照
會該鎮查照事理卽將各路逆賊有應設法招撫者
卽速多方曉諭招撫其負固拒命者卽行撲勦務必
淨絕根株早使難民復業并將情形不時飛報以憑
籌度

檄叅將蔣懋勛統領駐防常山官兵

康熙十五年八月

爲知照統領事照得官兵駐防常山營制不一非得能將統領無以明約束而資捍禦該叅將軍紀素嚴才識通練現今駐常合行專委統領爲此牌仰該叅將照牌事理即便嚴申軍紀加意鈴束凡在常各鎮官兵悉聽該叅將統領務須恤兵愛民與各將弁和衷共濟毋得推諉玩弛致負委任如有不法弁兵不遵約束立即據實具報以憑究處

檄催福督中軍官兵赴衢防剿

康熙十五年八月

爲軍務事奉

親王令諭福建督標官兵本親王已經行文調赴衢州該督將爾處綠旗官兵酌發一千員名速赴江山防禦等因奉此爲照衢郡逆賊雖經敗遁但西龍開常及廣信等處尙多伏莽需兵正殷今在衢官兵奉親王調取前去衢城兵單該標官兵速應赴衢防剿合亟知照爲此牌仰該將照牌事理即將該標原奉令諭調赴衢州官兵立即遵照刻日統領赴衢事關軍務不得遲延

飭金協都司任九玉勦撫湯溪土賊

康熙十五年八月

爲飭知事照得該都司已經本部院

題補江南前營遊擊員缺頃准

福建提督段

移催着令赴任前來似應聽赴新

任但查湯溪三源各路賊氛未靖勦撫正殷且該都司駐湯日久於地方情形寇賊出沒自所深悉若遽行更易一應機宜則初到彼土者猶恐未諳况江常各逆已經掃除湯邑土賊不過附和烏合之徒乘此大創之際勦撫竝施何難立靖除移覆福建提督外合卽飭知爲此牌仰本官照牌事理卽將該汛地方

各土寇設法招徠開誠曉諭速令來歸槩寬既往予以自新如有梗頑抗拒本官卽督發汛兵用心搜剿務淨根株一切事宜仍當悉心料理聽候

部文知照赴任勿因已經陞遷遂爾膜視取咎未便
嚴切

檄叅將蔣懋勦玉山開化賊寇

康熙十五年九月

爲酌議勦撫機宜以靖寇氛事據署常山縣撥報玉山賊首小林兒等帶領二百餘人在三十六都山內每日辰來午去又玉山子午口賊首顏飛隆帶領四五百人在彼住劄又開化賊寇俱退至龍山源其賊首吳正陳祿馬鵬張世英陳山張見可等步賊數千查龍山源北通開化東通華埠又通常山七都球雖爲江右玉山德興歧界實與開常毗連豈容依險負隅致貽後患合行酌議勦撫爲此牌仰該叅將照牌事理即便會同該縣并行問將弁從長確籌將玉山

縣賊首小林兒等作何招撫其開化縣龍山源各賊
在近日機宜自應先撫後剿或卽遴選能事之人前
往曉諭禍福開陳順逆利害招徠歸順如仍倚頑抗
拒乘其營壘未固器械未備之時酌發勁兵密訂師
期同日進剿并接連玉山之隘口作何防禦一併酌
議妥當星速具報以憑調度事關軍機毋得刻遲審
速

屏委標官卞佳招撫

康熙十五年九月

爲特委招撫以安殘黎事照得逆賊敗遁難民亟宜
來歸其從前迫脅之情本部院屢經示明宥懲槩不
追究乃聞各鄉猶有負嶠山谷徘徊觀望者甚失本
部院矜恤至意合行委官招撫爲此牌仰本官照牌
事理即便會同巡檢胡應龍投誠遊擊張三虎前往
洋溪源白巖源周公源尖樓蔡口獨山周公口翁源
湖山遂昌廿四都洋坑黃壇源龍鼻頭相思溪口湖
南破石柴家嶺舉村巖剝柘木十一都石門一帶四
都地方等處相機招撫如有負固賊黨及無歸難民

本官開陳利害嘉予維新設法招集具報安插其帶
去練長鄉兵俱聽本官約束嚴行禁戢不許生事擾
民如有違犯本官亦難辭咎至於洋溪源有無逆賊
馬勝造就砲位軍器隱藏在彼本官務須確查回覆
如係妄傳不得借端搜查騷擾民間自干軍法倘能
實心任事靖寇安民勤勞著績本部院隨當甄拔
題敘如或怠忽乖張定行按法究處不貸

獎勵千總趙秀

康熙十五年九月

爲獎勵事據標下將叅將報稱原常山把總何起先
叛受僞副將潛伏不赴投誠又僞遊擊祝茂華仍領
兵叛踞卑職前領憲票卽差千總趙秀冒險入山宣
佈招撫今於初七日二人俱經出山投誠見在給賞
外理合稟報等因到本部院據此爲照寇氛伏莽招
撫宜先該弁獨能冒險入山開誠撫輯以致僞弁何
起先等傾心向化殊爲可嘉合行獎勵爲此牌仰本
官照牌事理卽便益加勉勵立功報効果能再立功
勤本部院自有甄拔勉旃毋忽

檄叅將蔣懋勛招撫廣信地方

康熙十五年九月

爲軍務事據該叅將稟報選差撲得玉山縣有廣信府領兵賊首汪總兵林十二桑男王福等創營於一都楊宅地方有僞把總何起先同僞遊擊祝茂華已經投誠等情到本部院據此爲照玉山雖屬江右地鄰常邑所有遺孽正在勢窮若遣人齎諭往招必開風歸命合行知照相機招撫爲此牌仰該叅將照牌事理卽將發來諭帖會同全華府王同知商酌鼓勵投誠何起先齎往廣信府玉山縣等處地方開誠招諭立功之日定行敘錄俱毋違錯

牌委標員疊更司賑浙閩過往人夫

十五年
起
二十年止

爲委司賑給稽察人夫事照得大兵駐閩差使交馳
一應人夫匍匐長途殊爲困苦先經本部院酌計道
路捐發銀兩建設廠所買備米石茶葉什物委官賑
給粥食茶湯稍救饑渴兼恐過往滿漢兵丁擅捉人
夫擾害地方是以卽令該委官照站稽察人夫在案
今已一月應行更換合行知照爲此牌仰本官照牌
事理卽便前赴江山縣等處與原委官宋瑞昭等交
替明白本官管理賑給事宜遇有過往人夫給與粥
食務聽充飽煎備茶湯隨便接濟不得缺乏如人夫

落晚無處投宿者准與安歇將販過人夫毒十日一
報查考仍將過往人夫逐名查問如係不法兵丁私
自捉來而無牌票執據者卽行攔住放歸不許該兵
帶去如敢抗違無論滿漢旗營兵廝許卽查明的確
姓名一面指報以憑嚴拏究治本官務須專心董理
禁察侵盜體恤窮民嚴查夫役副此委任不得怠忽
瞻徇取咎

飭金協副將乘時招撫

康熙十五年九月

爲亟飭乘時招撫以安地方事照得閩逆敗遁各路零星殘寇無路可逃必至倚山負固乘此勢窮膽落之際苟能分遣的當人役設法招徠自必革心向化况本部院先經給示日來近處餘黨接踵輸誠已有明效今據該副將稟稱東武義等處行本營守備朱佳麟遣差招撫西湯溪等處行千總徐九乾豐旭等遣發招撫南山一帶令千把總許國用常定邦等分投招撫俱令近山人民齎示入山等情雖云各有責成但機貴敏捷方易收功若或遲回延諉不無致誤

合亟申飭爲此牌仰該副將照牌事理卽查金屬各處山源賊寇一面分委各官相機招徠仍一面遴遣的當人員前往開導乘此軍威赫濯之日正宜及時平靖地方清除積患早爲收效以覩該將實心任事毋容少緩致誤事機先有來歸者卽行鼓勵賞賚使餘黨感化如果抗拒不服卽便發兵相機搜勦星速用心佈置以副委任仍將勦撫情形不時具報查考均各凜遵勿違

飭樂清營大荆營各將乘時撫剿

康熙十五年九月

爲亟飭乘時撫剿以靖地方事照得溫州樂清地方淪陷已久前此猶以賊勢鴟張徐圖恢復今自衢郡下洲巨逆敗遁

王師斬關入閩直抵建寧處州石塘相繼剿蕩大兵收復雲松會師進取聲靈赫濯各路餘孽望風瓦解甌城象浦卽或拒守亦皆釜底游魂其他山源小醜乘時勦撫平定地方刻不容緩該將身在疆圉亟宜料理合卽申飭爲此牌仰該將照牌事理卽將未靖逆黨酌量機宜或勦或撫凡有革心歸命者卽當予以

自新如或率衆輸誠尤宜多方鼓勵除專委台巡道
前赴綏輯外其賊踞各縣作速相機恢復若有發兵
撲剿之處卽與該道合議而行毋得因循致誤事機
并嚴禁兵丁借端騷擾一應情形不時飛報以憑調
度該將若能實心整理克敵立功本部院自當優敘
倘或怠玩泄視軍政所關毋干咎責至切

照會黃巖鎮撫輯鄰疆

康熙十五年九月

爲特委撫輯鄰疆以靖寇亂事照得閩逆構禍三載地方被其淪陷人民悉罹湯火今

王師分路進剿所向無敵旬月之間衛屬各縣悉皆恢復處州石塘相繼掃除本部院念此殘疆百計整頓今各屬投戈效順者殆無虛日惟溫州叛鎮尙在逋誅但逆賊大勢已傾衆心瓦解乘此亟宜開導予以自新必盡輸誠恐後除經檄委台巡道前往大荆樂清一帶相機招撫綏輯流離并令酌動官銀鼓勵激賞以風向化外合併知照爲此照會該鎮查照事理

即便會同該道無分汛守多方招撫安輯如各路餘孽有能率衆投誠者會同該道鼓勵激賞分別安插其或仍前結聚即便遣發官兵撲剿示創以靖地方至叛鎮祖勳等若能悔禍革面自應悉宥前愆保全合境生靈仍當特疏

題請該鎮務須顯示此意俾令來歸一切應行事宜悉心區畫仍將被難人民加意撫恤凡有情形不時具報以憑調度該鎮謀勇素著故特專委料理以紓本部院東顧惟實心任事立有功績定當特疏

題敘切勿泄視

飭原任把總胡聯啓率兵來歸

康熙十五年九月

爲投誠事據該把總詞稱原防遂昌因兵寡莫支萬
不獲已暫歸賊營受僞副將原非甘心從賊今幸大
兵勦撫重覩天日伏乞准予投誠賞給委牌免罪執
照以圖報効等情到本部院據此爲照閩逆叛變侵
犯疆圉處屬地方駐守官兵或衆寡不敵因而淪陷
失身自非得已本部院原諒心迹屢示招徠在案况
朝廷恩綸沛沛脅從罔治凡有自拔來歸率衆納款者俱
照原銜錄用煌煌

天語炳若日星今該把總旣能自拔矢志可嘉除另給免

非照票外合再行知爲此牌仰原任處協把總胡聯
啓遵照卽將所領兵丁一併率領來歸再行設法招
徠立功報効定行從優敘錄毋得遲疑

照會溫州鎮剿撫直取甌城

康熙十五年九月

爲亟飭乘時剿撫以復疆圉事照得閩逆構禍三載淪陷地方人民悉罹湯火令

王師分路進剿所向克捷衛屬各縣盡皆恢復處屬漸次蕩平僅東甌一城尙未底定頃據樂清縣申報逃出難民供稱城中賊已寥寥坊市盡閉俱有倉惶失措之狀各路逆賊敗竄大勢已傾乘勝發兵長驅前進誠可不戰而克該鎮隨軍進剿是以檄行黃巖鎮就近聲援并行台巡道相機招撫在案今該鎮既已回處自應及時剿撫除移咨駐處總統莫并行

署處協王叅將外合行飭知爲此照會該鎮查照事
理卽便會商總統莫 并王叅將將見在官兵滿

甲及駐紮雲兵立卽酌調齊備相機前進直取溫州
所到地方申嚴號令撫輯殘黎務期秋毫無犯仍當
設法招撫開誠曉諭若能悔禍獻城革心向化保全
合境生靈准予從優擢用其投誠人等多方鼓勵一
應事宜從長籌酌恢復郡城本部院特疏

題敘以酬勳勞仍將發兵勦撫緣由不時具報以憑調
度均勿遲延審速

牌給千總葉順招撫

康熙十五年九月

爲開誠招撫以廣

皇仁事照得閩逆造亂淪陷地方一時受惑被脅之人悔悟有心自拔無路良可哀矜今賊寇敗遁正解甲歸正之時從前罪愆已經示諭槩不追究據稟有偽員勞雙隆原授都司劄付隨有多人俱在遂昌源蕩懇給免死照驗遵赴投誠合卽給牌招撫爲此牌給千總葉順赴該地方傳本部院開誠至意卽令率衆來歸願効力者准原銜錄用願歸農者安插得所勿得遲疑該千總招撫有功一併獎勵

牌給守備尹升招撫

康熙十五年九月

爲開誠招撫以廣

皇仁事照得閩逆流毒所到附從之人率遭迫脅自拔殊難誠堪矜憫本部院屢行招諭竝宥前愆今查原任衛協千總王孝向化有心猶豫未決合卽給牌招撫爲此牌給守備尹升赴該地方傳宣曉諭從前罪過槩不追究卽令率衆來歸准予原銜錄用其隨附兵丁願食糧淮收入伍欲歸農卽當安插勿得遲疑有負本部院開誠至意該員招撫有功一併獎勵

照會溫州鎮亟赴料理嚴疆

康熙十五年十月

為亟飭赴溫料理保固嚴疆事照得溫州被陷官民
已經剃髮歸誠惟是該郡淪沒已久城鄉殘破人民
逃亡及今恢復務必從新整頓加意料理除嚴檄布
政司速催在省府縣星馳赴任外合亟飛檄嚴飭為
此照會該鎮查照事理文到立即前赴溫州彈壓地
方將見今投誠原投偽職人員并有無偽劄印信者
逐一通查明白星速造冊呈送以憑

題敘至尙有無知餘黨懷疑畏罪竄匿山谷及乘船潛
遁海濱者該鎮即便開誠曉諭着令迅速來歸如能

帶有賊船兵丁效順者自當從優敘錄至於城鄉人民久罹湯火困苦倍常務必加意懷保安插得所一應官兵更須申明號令嚴行約束不許藉端搜捕騷擾如有故違卽以軍法重治其瑞安平陽二縣今應作何綏靖凡有未盡事宜該鎮從長區畫悉心運籌以副倚任不得因循怠忽致干咎愆仍將奉行緣由具文報查毋違

檄飭沿海鎮將稽察固防

康熙十七年三月

爲欲靖海氛務嚴汛守再申稽察之令以固邊防事
照得海逆未靖賊踪飄突靡常汛守官兵所當刻刻
隄防晝夜瞭摸至如昏夜陰霾風潮緊急之際或逆
寇游移洋面奸民窺隙潛通尤宜加謹巡邏奮勇堵
禦以杜登犯透越本部院節次飭行不啻三令五申
矣查近據各屬塘報仍有海寇登犯劫掠民人殺傷
男婦焚燬屋宇之事皆由設防官兵疎玩懈弛虛冒
汛守奸民交通接濟甚有愍不畏死之弁知情故縱
覓利營私平時旣失稽查臨事又多畏怯扶同玩忽

大千軍紀除經分案查取疎防職名叅處外值此春汛已屆邊烽未息合再嚴飭爲此照會該鎮照依事理卽便督飭汛防官兵凡臺寨撥派弁目不時查點毋許影射虛伍擅離汛守責令晝夜瞭防如有賊艘飄忽登犯立即一面堵禦一面飛報該營將親領官兵撲剿毋使登劫沿海居民平時巡查稽察申嚴保甲如有形蹤不軌之徒置備違禁貨物及借名捕魚出入界外者立時協拏申解究擬慎勿徇玩故縱致干法網總之內奸斂戢外寇自消防禦旣周邊方自固該鎮將身在地方責任所係毋視泛常凜之慎之

諭杭州溫州二副將犒賞弁目兵丁

康熙十七年六月

諭馬趙二副將知悉往日浙省用兵該將等著積疆
場身不解甲歷經三載本部院每念艱危之際賴爾
將士同心齊力得以成功地方既平正期其得休息
而該營官兵隨征入閩又經二年比之各營勞苦更
倍本部院時切懸念屢啓

親王調回爾等

親王以浙江官兵皆忠勇用命藉以護衛軍前是以未
允今復調援漳州雖將士矢心報

國樹立勳名固爲素志但回浙之期尙未可定當此炎

天枕戈對壘本部院遠在隔省無由親自撫恤淡軫
於懷今特差員齎銀四百兩赴營聊充牛酒之資該
將可照單開數目分給弁目兵丁傳諭本部院慰勞
之意特諭

照會定溫平三鎮沿海嚴謹備禦

康熙十七年八月

爲浙閩海洋連接亟飭謹嚴整備事照得沿海賊寇連踪窺犯每據申報輒云尾追不及未聞大創捷音致彼來去自如日肆猖獗是各將弁於聯絡策應出奇制勝之道全未講求徒以水陸遙隔爲詞不思地方一有疎虞百戰何能辭咎况今閩省海寇正在鴟張狡謀不可不備或浙洋之寇窺我官兵調發因而勾引大夥乘機突犯或閩洋之寇見大兵陸續南下因而流突浙境以圖避竄擊虛皆不可定一切營伍汛守事宜務須從新整頓處處周防事事警飭必使

無懈可乘庶可保固疆宇合亟申飭爲此照會該鎮
查照事理卽便嚴行所轄簡練兵丁秣養馬匹整齊
砲械查有老弱兵丁速行簡汰卽日頂補砲位久未
試用者卽行洗試如或火藥不敷立即請給弓箭等
項逐一驗備其要隘處所務選能員領兵防守應添
撥者速卽添撥哨探瞭望務令星馳傳報如遇警息
本汛鄰汛以及存城官兵協力勦禦不得收視至調
缺額兵本部院現在酌議另候知照勿以籲請增兵
虛文塞責文到卽將各項事宜作何整頓緣由具文
備覆倘悠忽從事取咎匪細慎速

檄湖處杭嚴四協調兵彈壓延平

康熙十七年八月

爲海氛方熾等事康熙十七年八月初一日准

兵部密咨內開題覆福建撫院吳

題前事等因

今福建延平等府需兵彈壓應將浙省各營官兵或三千或二千名卽速調遣迅發彈壓延平等處等因奉

旨依議速行欽此移咨到本部院准此爲照浙省地方山海交錯額兵原少且又屢經抽調汛防自是不敷今既奉

旨調遣自應欽遵除將浙省調援盆亭官兵發往延平外

合再抽調爲此牌仰該副將照牌事理卽於該協營
內挑選精兵八百名委衛衛薛受益千總羅士英等
統領星赴本部院軍前聽候遣發不得遲延短少致
干軍紀需用大船移知經過地方官撥給并飭該管
官約束兵丁不許沿途生事至於絡處汛地仍酌量
派撥加謹巡防毋得稍有疎忽先將官兵員名數目
起行日期具報查考勿違

照會定海鎮飭催撲剿海寇

康熙十七年八月

爲移商防守以固海疆事案據該鎮具詳象汛石燕港等處海賊盤踞今戰船現在修造未便撲剿請一面嚴飭沿海汛防加謹備禦候船隻完工督師搜剿等因本部院查先據象山營請發舟師先剿石燕港等處餘孽批行該鎮速議原非專爲象山一汛現今堪用戰船尙有二十餘隻若整飭將士上船演練使時刻有出洋之勢遇可襲擊之處相機迅發雖蕩盡餘氛必候戰船齊備如隨時零剿見在之船儘可生法前曾照會該鎮未據確覆邇來海洋賊艘日漸增

加若不設法撲勦貽誤非輕合再飭催爲此照會該
鎮查照事理卽將近日常頭頭石燕港等處逆賊踞
巢及往來游移情形速行確探并現在堪用戰船作
速整頓出奇制勝立速確議具詳核奪現今寧郡所
屬地方已經題奉

俞旨令該鎮管轄責任綦重毋再悠忽致誤事機大有未
便速速

差員嚴拏不法兵廝

康熙十七年八月

爲嚴拏不法兵廝騷擾地方勒帶過站人夫事照得
西安江山地方路當進關孔道過往兵馬絡繹不絕
一應夫役皆取給於該縣百姓供應繁苦疲憊已極
聞有不法兵廝將領到人夫勒索折價併於身畔搜
取盤費甚至衣服食物罄剝一空又將水次緯夫逼
勒挑運過站稍不如意百般箠楚日夜無寧以致夫
役死亡接踵兵廝成羣作隊經過地方擅入村莊搶
奪牲畜物件捉拏民人驚嚇婦女種種橫行無惡不
作屢經本部院禁戢在案合再差官查拏爲此牌仰

本官照牌事理即便前赴百靈街江山縣清湖地方
以及廿八都沿途禁戢兵廝不許生事滋擾凡西安
絳夫送船至江山卽行盡數放回不許畱帶一夫過
站如有前項不法兵廝捉畱人夫或強勒折乾搜剝
衣服食物并擅入民家恣意擾害者卽行拿解軍前
以憑會同

都統審實輕則按依軍法懲處重則啓請

親王察究如有夫役患病及被兵丁毆傷不能前往者
卽畱下發回不得仍令帶往如有違犯一併拿解究
治不貸

飭衢處二協副將防剿竄賊

康熙十七年八月

為嚴飭防剿竄賊以固疆圉事照得逆賊江機楊一豹等盤踞上永錢村等處出沒擾害先經本部院啓請

親王并准

江西督院咨移會合三省剿除本部院節經檄行援防各營整備進剿在案今聞逆孽已知三省大兵合剿自揣勢窮力蹙四散奔竄多往處屬山谷隱藏雖釜底游魂不足為慮但匪類潛蹤終為地方貽害合亟密飭為此牌仰該將照牌事理即便遵照立選能

員前赴仙霞關江山鳳林各處確勘通達賊營要隘
處所多撥精兵扼守如有賊徒宵遁即便尾追盡行
勦殺倘遇形蹤詭秘之徒必須嚴行盤詰拏究毋使
一葦漏網仍差精細目兵遠偵確撲凡有情形不時
飛報以憑調度毋得違錯

檄中軍副將會勦江西逆賊

康熙十七年八月

爲緊急軍務事康熙十七年八月十七日准

江西總督部院董

咨開照得逆賊楊一豹江拐

子等盤踞中錢村洪山等處荼毒生民今本部院親
統官兵已抵信郡的於本月二十以內調發官兵分
路進剿相應咨請貴部院速發貴省官兵由馬踏跡
關而進務於十八日至錢村會剿庶逆賊不致奔逸
等因到本部院准此爲照逆賊江機楊一豹等盤踞
江西永豐一帶錢村等處出沒擾害先經本部院啓
請

親王會同三省官兵合剿今又准

江西督院咨會等因前來令行專委統領爲此牌仰
該副將照牌事理卽便遵照帶領標下并衛協官兵
八百名見調常山兵二百名共成一千名一併統領
次早起程由永豐前赴馬踏跡關會同江西福建官
兵確撲逆孽情形嚴行夾剿務靖根株毋使遺孽流
突貽害地方仍將進剿情形不時飛報以憑調度所
過地方務須約束兵丁秋毫無犯功成之日定行特
疏

題敘毋得怠忽

檄金協都司郭正明等截擊敗寇

康熙十七年八月

爲軍務事據該都司等呈稱見在盆亭兵丁四百餘
名今或往延平或候會勦統候裁示等因到本部院
據此爲照該都司等所領官兵先經檄行前赴延平
彈壓今永饒餘逆見在會勦已經本部院調發標下
中軍副將吳三畏統領官兵由馬踏跡關進發盆亭
等處爲控扼三省要地逼近大路總係閩省地方應
暫畱駐嚴加堵禦策應以防逆賊奔逸流突據報前
因合亟行知爲此牌仰該都司照牌事理即便會同
嚴協都司馬起龍署嘉興營守備張文福將見在官

兵於緊要口子嚴加堵禦仍偵探江浙進剿情形如
有敗遁逆賊流突一面截擊俟進剿稍定另檄知照
前赴延平不得疎忽

檄守備張萬成領兵協防二渡關

康熙十七年八月

爲緊急軍務事照得本部院檄調該守備帶兵赴閩延平彈壓今江西上永餘逆江機楊一豹等流毒地方本部院見在調發官兵移行會剿查二渡關等處爲三省扼要界上經檄行嚴協都司馬起龍統領杭湖二協官兵五百名暫行駐守外合卽知照爲此牌仰該守備照牌事理卽將所領兵丁卽日前赴二渡關會同嚴協都司馬起龍將緊要隘口酌量分防嚴加堵禦如有敗遁逆賊流突侵犯卽奮勇截擊以靖根株不得疎玩候會剿稍定另檄調遣進閩毋違

檄叅將饒承德會兵協剿山寇

康熙十七年八月

爲稟報事據該將呈稱逆賊江機等現在三省會剿誠恐逆賊敗遁屢奉嚴飭堵禦今據報逆賊王召福帶領僞衆屯駐永豐九都之松尖山內或揆知我兵會剿假就撫之名爲賊外應亦不可知亟欲帶兵進剿必需楓嶺營撥發官兵由六石關堵截方克有濟惟因關汛重大呈請示行等因到本部院據此爲照逆賊江機等見在三省會剿自必勢窮力竭希冀奔遁先經本部院飭行該將偵探情形相機堵禦在案今據前因查楓嶺營官兵除福建左鎮調遣會剿外

存兵無多不能撥發今益亭二渡關已經本部院陸續調發杭湖處協官兵七百名行令都司馬起龍統領堵禦自可就近策應合卽知照爲此牌仰該將照牌事理卽便會同嚴協都司馬起龍將前項逆賊相機剿除以杜流突或開誠招撫以靖地方立卽議妥就近酌行仍於各汛嚴加偵緝防禦不得疎玩

檄叅將饒承德查仙霞營房窩舖

康熙十七年八月

爲軍務事照得仙霞關爲浙閩險要是以調發該將帶兵駐守分佈防禦聞在關兵目多有染患疾病必係駐劄處所山嵐瘴霧寒溼侵加或營房窩舖未曾整理以致感冒染疾殊爲懸念合卽行查爲此牌仰該將照牌事理卽將仙霞汛地見在駐劄兵丁應需營房窩舖是否足用如應添造或應修理之處立即查勘明白并應需工料匠役人夫等項若干一併估計具文冊報以憑給發銀兩檄行該府縣構造修葺以資屯劄速報毋違

檄叅將饒承德招撫江機等渠寇

康熙十七年九月

爲特飭開誠招撫以靖鄰氛事照得江西餘寇久不悔禍歸命流害地方見在三省會剿頃據塘報業已攻破巢穴江機退遁雞公山官兵會合刻期進攻本部院念此無知之徒原屬

朝廷赤子或一時失計以致自新無路亡命山林昨據該叅將呈報江機等有願赴浙江歸誠等語按其情詞已有悔過遷善之心如果幡然革面自應嘉予維新除經給牌差委隨征都司鄭鳳城招撫外合併知照爲此牌仰該將照牌事理即便遴選精細嚮導并專

委人員協同本官不必由吳副將及會勦各營盤前進另覓路徑開誠招撫明示禍福宣布

皇恩如能及早歸誠從前罪愆槩免追究仍准分別錄用兵丁補伍歸農安插得所務令乘時向化不得疑畏觀望自失良圖該將等招撫著績一併從優

題敘將遣發緣由速報查考發來免罪牌一併收付毋違